

摛藻堂四庫全書薈要

史部

欽定四庫全書
唐書卷五百一一百四十二

史部

唐書卷十五

宋 翰 林 學 士 歐 陽 修 撰

禮樂志第五

皇后歲祀一季春吉已享先蠶遂以親桑散齋三日於後殿致齋一日於正寢一日於正殿前一日尚舍設御幄於正殿西序及室中俱東向致齋之日晝漏上水一刻尚儀版奏請中嚴尚服帥司仗布侍衛司賓引內命

婦陪位六尚以下各服其服詣後殿奉迎尚儀版奏外
辨上水二刻皇后服鉢釵禮衣結佩乘輿出自西房華
蓋警蹕皇后即御坐六尚以下侍衛一刻頃尚儀前跪
奏稱尚儀妾姓言請降就齋室皇后降坐乘輿入室散
齋之日內侍帥內命婦之吉者使蠶於蠶室諸預享者
皆齋前享三日尚舍直長設大次於外壇東門之內道
北南向命婦及六尚以下次於其後俱南向守宮設外
命婦次大長公主長公主以下於南壇之外道西

三公夫人以下在其南重行異位東向北上陳饌幔於
內壇東門之外道南北向前享二日大樂令設宮縣之
樂於壇南內壇之內諸女工各位於縣後右校為采桑
壇於壇南二十步所方三丈高五尺四出陛尚舍量施
帷障於外壇之外四面開門其東門足容厭翟車前享
一日內謁者設御位於壇之東南西向望瘞位於西南
當瘞塗西向亞獻終獻位於內壇東門之內道南執事
者位於其後重行異位西向北上典正位於壇下一位

於東南西向一位於西南東向女史各陪其後司贊位
於樂縣東北掌贊二人在南差退西面又設司贊掌贊
位於埋塙西南東面南上典樂舉麾位於壇上南陛之
西東向司樂位於北縣之間當壇北向內命婦位於終
獻之南絕位重行異位西向北上外命婦位於中壇南
門之外大長公主以下於道東西當內命婦差退太
夫人以下於道西去道遠近如公主重行異位相向北
上又設御采桑位於壇上東向內命婦采桑位於壇下

當御位東南北向西上執御鉤筐者位於內命婦之西
少南西上內外命婦執鉤筐者位各於其采桑位之後
設門外位享官於東壇之外道南從享內命婦於享官
之東北面西上從享外命婦於南壇之外道西如設次
設酒尊之位於壇上東南隅北向西上御洗於壇南陞
東南亞獻之洗又於東南俱北向幣筐於壇上尊坫之
所晡後內謁者帥其屬以尊坫罍洗筐篚入設於位升
壇者自東陛享日未明十五刻太官令帥宰人以鸞刀

割牲祝史以豆取毛血置於饋所遂烹牲五刻司設升
設先蠶氏神座於壇上北向南向前享一日金吾奏請
外命婦等應集壇所者聽夜行其應采桑者四人各有
女侍者進筐鉤載之而行其日未明四刻槌一鼓為一
嚴二刻槌二鼓為再嚴尚儀版奏請中嚴一刻槌三鼓
為三嚴司賓引內命婦入立於庭重行西面北上六尚
以下詣室奉迎尚服員寶內僕進厭翟車於閣外尚儀
版奏外辦馭者執轡皇后服鞠衣乘輿以出華蓋侍衛

警蹕內命婦從出門皇后升車尚功進鉤司製進筐載
之內命婦及六尚等乘車從諸翊駕之官皆乘馬駕動
警蹕不鳴鼓角內命婦宮人以次從其日三刻尚儀及
司醞帥其屬入寶尊罍及幣太官令寶諸籩豆簠簋俎
等內謁者帥其屬詣厨奉饌入設於饌幔內駕將至女
相者引享官內典引引外命婦俱就門外位駕至大次
門外廻車南向尚儀進車前跪奏稱尚儀妾姓言請降
車皇后降車乘輿之大次華蓋繖扇尚儀以祝版進御

署出奠於坫尚功司製進受鉤筐以退典贊引亞獻及從享內命婦俱就門外位司贊帥掌贊先入就位女相者引尚儀典正及女史祝史與女執尊罍筐幕者入自東門當壇南北向西上司贊曰再拜掌贊承傳尚儀以下皆再拜就位司樂帥女工人入典贊引亞獻終獻女相者引執事者司賓引內命婦內典引外命婦入就位皇后停大次半刻頃司言引尚宮立於大次門外當門北向尚儀版奏外辦皇后出次入自東門至版位西

向立尚宮曰再拜皇后再拜司贊曰衆官再拜在位者皆再拜尚宮曰有司謹具請行事樂三成尚宮曰再拜皇后再拜司贊曰衆官再拜在位者皆再拜壇上尚儀跪取幣於篚興立於尊所皇后自壇南陞升北面立尚儀奉幣東向進皇后受幣進北向跪奠於神座少退再拜降自南陞復于位初內外命婦拜訖女祝史奉毛血之豆立於內壇東門之外皇后已奠幣乃奉毛血入升自南陞尚儀迎引於壇上進跪奠於神座前皇后既升

奠幣司膳出帥女進饌者奉饌陳於內壇東門之外皇后既降復位司膳引饌入至階女祝史跪徹毛血之豆降自東陛以出饌升自南陛尚儀迎引於壇上設於神座前皇后詣罍洗尚儀跪取匝興沃水司言跪取盤興承水皇后盥司言跪取巾於篚進以帨受巾跪奠於篚乃取爵於篚興進受爵尚儀酌罍水司言奉盤皇后洗爵司言授巾皆如初皇后升自壇南陛詣酒尊尚儀贊酌醴齊進先蠶氏神座前北向跪奠爵興少退立尚儀

持版進於神座之右東面跪讀祝文皇后再拜尚儀以
爵酌上尊福酒西向進皇后再拜受爵跪祭酒啐酒奠
爵興尚儀帥女進饌者持籩俎進神前三牲胙肉各置
一俎又以籩取稷黍飯共置一邊尚儀以飯籩胙俎西
向以次進皇后每受以授左右乃跪取爵遂飲卒爵興
再拜降自南陛復于位初皇后獻將畢典贊引貴妃詣
罍洗盥手洗爵自東陛升壇酌盎齊于象尊進神座前
北向跪奠爵興少退再拜尚儀以爵酌福酒進貴妃再

拜受爵跪祭遂飲卒爵再拜降自東陛復位昭儀終獻
如亞獻尚儀進神座前跪徹豆司贊曰賜胙掌唱曰衆
官再拜在位者皆再拜尚宮曰再拜皇后再拜司贊曰
衆官再拜在位者皆再拜尚宮請就望瘞位司贊帥掌
贊就瘞壇西南位皇后至望瘞位西向立尚儀執篚進
神座前取幣自北陛降壇西行詣瘞壇以幣置於壇司
贊曰可瘞壇東西各四人實土半壇尚宮曰禮畢請就
采桑位尚宮引皇后詣采桑壇升自西陛東向立初皇

后將詣望瘞位司賓引內外命婦采桑者執鉤筐者皆

就位

內外命婦一品各二人二品三品各一人

皇后既至尚功奉金鉤自止

陞升進典製奉筐從升皇后受鉤采桑典製以筐受之

皇后采三條止尚功前受鉤典製以筐俱退皇后初采

桑典製等各以鉤授內外命婦皇后采桑訖內外命婦

以次采女史執筐者受之內外命婦一品采五條二品

采九條止典製等受鉤與執筐者退復位司賓各引內

外命婦采桑者以從至蠶室尚功以桑授蠶母蠶母切

之以授婕妤食蠶灑一樽止尚儀曰禮畢尚宮引皇后還大次內外命婦各還其次尚儀典正以下俱復執事位司贊曰再拜尚儀以下皆再拜出女工人以次出其祝版燔於齊所車駕還宮之明日內外命婦設會於正殿如元會之儀命曰勞酒其有司歲所常祀者十有三立春後丑日祀風師立夏後申日祀雨師立秋後辰日祀靈星立冬後亥日祀司中司命司人司祿季夏土王之日祭中雷孟冬祭司寒皆一獻祝稱天子謹遣其中

春秋中秋釋奠于文宣王武成王皆以上丁上戊國學以
祭酒司業博士三獻樂以軒縣前享一日奉禮郎設三
獻位于東門之內道北執事位於道南皆西向北上學
官館官位於縣東當執事西南西向學生位於館官之
後皆重行北上觀者位於南門之內道之左右重行北
面相對為首設三獻門外位於東門之外道南執事位
於其後每等異位北向西上館官學官位於三獻東南
北向西上設先聖神坐於廟室內西楹間東向先師於

先聖東北南向其餘弟子及二十一賢以次東陳南向
西上其餘皆如常祀皇子東脩東帛一篚五匹酒一壺
二斗脩一案五牋具日平明皇子服學生之服其服青衿至

學門外博士公服執事者引立學堂東階上西面相者
引皇子立於門東西面陳東帛篚壺酒脯案於皇子西
南當門北向重行西上將命者出立門西東面曰敢請
就事皇子少進曰某方受業於先生敢請見將命者入
告博士曰某也不德請皇子無辱若已封王則云請王無辱將命者

出告皇子固請博士曰某也不德請皇子就位某敢見
將命者出告皇子曰某不敢以視賓客請終賜見將命
者入告博士曰某辭不得命敢不從將命者出告執篚
者以篚東面授皇子皇子執篚博士降俟于東階下西
面相者引皇子執事者奉壺酒脩案以從皇子入門而
左諸西階之南東面奉酒脩案立於皇子西南東面北
上皇子跪奠篚再拜博士答再拜皇子還避遂進跪取
篚相者引皇子進博士前東面授幣奉壺酒脩案者從

莫於博士前博士受幣執事者取酒脩幣以東相者引
皇子立於階間近南北面奉酒脩者出皇子拜訖相者
引皇子出其學生束帛酒脩以見如皇子武德二年始
詔國子學立周公孔子廟七年高祖釋奠焉以周公為
先聖孔子配九年封孔子之後為襄聖侯貞觀二年左
僕射房玄齡博士朱子奢建言周公尼父俱聖人然釋
奠於學以夫子也大業以前皆孔子為先聖顏回為先
師乃罷周公升孔子為先聖以顏回配四年詔州縣學

皆作孔子廟十一年詔尊孔子為宣父作廟於兗州給
戶二十以奉之十四年太宗觀釋奠於國子學詔祭酒
孔穎達講孝經二十一年詔左丘明卜子夏公羊高穀
梁赤伏勝高堂生戴聖毛萇孔安國劉向鄭衆賈逵杜
子春馬融盧植鄭康成服虔何休王肅王弼杜預范甯
二十二人皆以配享而尼父廟學官自祭之祝曰博士
某昭告于先聖州縣之釋奠亦以博士祭中書侍郎許
敬宗等奏禮學官釋奠于其先師鄭氏謂詩書禮樂之

官也四時之學將習其道故釋奠各以其師而不及先聖惟春秋合樂則天子視學有司總祭先聖先師秦漢釋奠無文魏則以太常行事晉宋以學官主祭且國學樂以軒縣尊俎須於官非臣下所可專也請國學釋奠以祭酒司業博士為三獻辭稱皇帝謹遣州學以刺史上佐博士三獻縣學以令丞主簿若尉三獻如社祭給明衣會皇太子釋奠自為初獻以祭酒張後脣亞獻光州刺史攝司業趙弘智終獻永徽中復以周公為先聖

孔子為先師顏回左丘明以降皆從祀顯慶二年太尉
長孫無忌等言禮釋奠于其先師若禮有高堂生樂有
制氏詩有毛公書有伏生又禮始立學釋奠于先聖鄭
氏註若周公孔子也故貞觀以夫子為先聖衆儒為先
師且周公作禮樂當同王者之祀乃以周公配武王而
孔子為先聖總章元年太子弘釋奠于學贈顏回為太
子少師曾參少保咸亨元年詔州縣皆營孔子廟武后
天授元年封周公為褒德王孔子為隆道公神龍元年

以鄒魯百戶為隆道公采邑以奉歲祀子孫世襲襲聖
侯睿宗太極元年以兗州隆道公近祠戶三十供灑掃
加贈顏回太子太師曾參太子太保皆配享玄宗開元
七年皇太子齒胄於學謁先聖詔宋璟亞獻蘇頤終獻
臨享天子思齒胄義乃詔三獻皆用胄子祀先聖如釋
奠右散騎常侍褚无量講孝經禮記文王世子篇明年
司業李元瓘奏先聖廟為十哲象以先師顏子配則配
象當坐今乃立侍餘弟子列象廟堂不豫享而范甯等

皆從祀請釋奠十哲享於上而圖七十子於壁曾參以
孝受經於夫子請享之如二十二賢乃詔十哲為坐象
悉豫祀曾參特為之象坐亞之圖七十子及二十二賢
於廟壁二十七年詔夫子既稱先聖可謚曰文宣王遣
三公持節冊命以其嗣為文宣公任州長史代代勿絕
先時孔廟以周公南面而夫子坐西墉下貞觀中廢周
公祭而夫子位未改至是二京國子監天下州縣夫子
始皆南向以顏淵配贈諸弟子爵公侯子淵充公子騫

費侯伯牛鄆侯仲弓薛侯子有徐侯子路衛侯子我齊
侯子貢黎侯子游吳侯子夏魏侯又贈曾參以降六十
七人參成伯顥孫師陳伯澹臺滅明江伯宓子賤單伯
原憲原伯公冶長莒伯南宮适邾伯公晳哀卿伯曾點
宿伯顏路杞伯商瞿蒙伯高柴共伯漆雕開滕伯公伯
寮任伯司馬牛向伯樊遲樊伯有若卞伯公西赤邵伯
巫馬期鄆伯梁鱣梁伯顏柳蕭伯冉孺鄒伯曹鄖豐伯
伯虔鄒伯公孫龍黃伯冉季產東平伯秦子南少梁伯

漆雕敏武城伯顏子驕琅邪伯漆雕徒父須句伯壤駟
赤北徵伯商澤睢陽伯石作蜀邱邑伯任不齊任城伯
公夏首亢父伯公良孺東牟伯后處營丘伯秦開彭衙
伯奚容箴下邳伯公肩定新田伯顏襄臨沂伯鄆單飼
鞬伯句井疆淇陽伯罕父黑乘丘伯秦商上洛伯申黨
召陵伯公祖子之期思伯榮子旗雩婁伯縣成鉅野伯
左人郢臨淄伯燕伋漁陽伯鄭子徒榮陽伯秦非汎陽
伯施常乘氏伯顏噲朱虛伯步叔乘淳于伯顏之僕東

武伯原亢籍菜蕪伯樂欵昌平伯廉潔荀父伯顏何開
陽伯叔仲會瑕丘伯狄黑臨濟伯邽巽平陸伯孔忠汶
陽伯公西與如重丘伯公西歲祝阿伯於是二京之祭
牲太牢樂宮縣舞六佾矣州縣之牲以少牢而無樂二
十八年詔春秋二仲上丁以三公攝事若會大祀則用
中丁州縣之祭上丁上元元年肅宗以歲旱罷中小祀
而文宣之祭至仲秋猶祠之於太學永泰二年八月脩
國學祠堂成祭酒蕭昕始奏釋奠宰相元載杜鴻漸李

抱玉及常參官六軍將軍就觀焉自復二京惟正會之樂用宮縣郊廟之享登歌而已文武二舞亦不能具至是魚朝恩典監事乃奏宮縣於論堂而雜以教坊工伎貞元九年季冬貢舉人謁先師日與親享廟同有司言上丁釋奠與大祠同即用中丁乃更用日謁於學元和九年禮部奏貢舉人謁先師自是不復行矣開元十九年始置太公尚父廟以留侯張良配中春中秋上戊祭之牲樂之制如文宣出師命將發日引辭于廟仍以古

名將十人為十哲配享天寶六載詔諸州武舉人上省
先謁太公廟乾元元年太常少卿于休烈奏秋享漢祖
廟旁無侍臣而太公乃以張良配子房生漢初佐高祖
定天下時不與太公接古配食廟庭皆其佐命太公人
臣也誼無配享請以張良配漢祖廟上元元年尊太公
為武成王祭典與文宣王比以歷代良將為十哲象坐
侍秦武安君白起漢淮陰侯韓信蜀丞相諸葛亮唐尚
書右僕射衛國公李靖司空英國公李勣列於左漢太

子少傅張良齊大司馬田穰苴吳將軍孫武魏西河守
吳起燕昌國君樂毅列於右以良為配後罷中祀遂不
祭建中三年禮儀使顏真卿奏治武成廟請如月令春
秋釋奠其追封以王宜用諸侯之數樂奏軒縣詔史館
考定可配享者列古今名將凡六十四人圖形焉越相
國范蠡齊將孫臏趙信平君廉頗秦將王翦漢相國平
陽侯曹參左丞相絳侯周勃前將軍北平太守李廣大
司馬冠軍侯霍去病後漢太傅高密侯鄧禹左將軍膠

東侯賈復執金吾雍奴侯寇恂伏波將軍新息侯馬援
太尉槐里侯皇甫嵩魏征東將軍晉陽侯張遼蜀前將
軍漢壽亭侯關羽吳偏將軍南郡太守周瑜丞相婁侯
陸遜晉征南大將軍南城侯羊祜撫軍大將軍襄陽侯
王濬東晉車騎將軍康樂公謝玄前燕太宰錄尚書太
原王慕容恪宋司空武陵公檀道濟梁太尉永寧郡公
王僧辯北齊尚書右僕射燕郡公慕容紹宗周大冢宰
齊王宇文憲隋上柱國新義公韓擒虎柱國太平公史

萬歲唐右武侯大將軍鄂國公尉遲敬德右武衛大將
軍邢國公蘇定方右武衛大將軍同中書門下平章事
韓國公張仁亶兵部尚書同中書門下三品中山公王
晙夏官尚書同中書門下三品朔方大總管王孝傑齊
相管仲安平君田單趙馬服君趙奢大將軍武安君李
牧漢梁王彭越太尉條侯周亞夫大將軍長平侯衛青
後將軍營平侯趙充國後漢大司馬廣平侯吳漢征西
大將軍夏陽侯馮異建威大將軍好畤侯耿弇太尉新

豐侯段熲魏太尉鄧艾蜀車騎將軍西鄉侯張飛吳武
威將軍南郡太守辱陵侯呂蒙大司馬荊州牧陸抗晉
鎮南大將軍當陽侯杜預太尉長沙公陶侃前秦丞相
王猛後魏太尉北平王長孫嵩宋征虜將軍王鎮惡陳
司空南平公吳明徹北齊右丞相咸陽王斛律光周太
傅大宗伯燕國公于謹右僕射鄖國公韋孝寬隋司空
尚書令越國公楊素右武侯大將軍宋國公賀若弼唐
司空河間郡王孝恭禮部尚書聞喜公裴行儉兵部尚

書同中書門下三品代國公郭元振朔方節度使兼御
史大夫張齊丘太尉中書令尚父汾陽郡王郭子儀貞
元二年刑部尚書關播奏太公古稱大賢下乃置亞聖
義有未安而仲尼十哲皆當時弟子今以異時名將列
之弟子非類也請但用古今名將配享去亞聖十哲之
名自是唯享武成王及留侯而諸將不復祭矣四年兵
部侍郎李紓言開元中太公廟以張良配以太常卿少
卿三獻祝文曰皇帝遣某敢昭告至上元元年贈太公

以王爵祭典同文宣有司遂以太尉獻祝版親署夫太
公周之太師張良漢之少傅今至尊屈禮於臣佐神何
敢歆且文宣百世所宗故樂以宮縣獻以太尉尊師崇
道也太公述作止六韜勲業著一代請祝辭不進署改
昭告為敬祭留侯為致祭獻官用太常卿以下百官議
之多請如紓言左司郎中嚴況等議曰按紓援典訓尊
卑之節當矣抑猶有未盡夫大名徽號不容虛美而太
公兵權奇計之人耳當殷之失德諸侯歸周遂為佐命

祀典不云乎法施於人則祀之如仲尼祖述堯舜憲章文武刪詩書定禮樂使君君臣臣父父子子皆宗之法施於人矣貞觀中以太公兵家者流始令磻溪立廟開元漸著上戊釋奠禮其進不薄矣上元之際執事者苟意於兵遂封王爵號擬文宣彼於聖人非倫也謂宜去武成王號復為太公廟奠享之制如紂請刑部員外郎陸淳等議曰武成王殷臣也紂暴不諫而佐周傾之夫尊道者師其人使天下之人入是廟登是堂稽其人思

其道則立節死義之士安所奮乎聖人宗堯舜賢夷齊
不法桓文不贊伊尹殆謂此也武成之名與文宣偶非
不刊之典也臣愚謂罷上元追封立廟復磻溪祠有司
以時享斯得矣左領軍大將軍令狐建等二十四人議
曰兵革未靖宜右武以起忠烈今特貶損非勸也且追
王爵以時祠為武教主文武竝宗典禮已久改之非也
乃詔以將軍為獻官餘用紓奏自是以上將軍大將軍
將軍為三獻其五岳四鎮歲一祭各以五郊迎氣日祭

之東岳岱山於兗州東鎮沂山於沂州南岳衡山於衡
州南鎮會稽於越州中岳嵩高於河南西岳華山於華
州西鎮吳山於隴州北岳恒山於定州北鎮醫無間於
營州東海於萊州淮於唐州南海於廣州江於益州西
海及河於同州北海及濟於河南

唐書卷十五

唐書卷十五考證

禮樂志五內命婦采桑位于壇下○此下通典有當御位東北南向西上外命婦采桑位于壇下十八字此係脫文

唐書卷十五考證

欽定四庫全書
薈要卷五千一百四十三

史部

唐書卷十六

宋 翰 林 學 士 歐 陽 修 撰

禮樂志第六

二曰賓禮以待四夷之君長與其使者蕃國主來朝遣使者迎勞前一日守宮設次於館門之外道右南向其日使者就次蕃主服其國服立於東階下西面使者朝服出次立於門西東面從者執束帛立於其南有司出

門西面曰敢請事使者曰奉制勞某主稱其國名有司入告

蕃主迎於門外之東西面再拜俱入使者先升立於西

階上執東帛者從升立於其北俱東向蕃主乃升立於

東階上西面使者執幣曰有制蕃主將下拜使者曰有

後制無下拜蕃主旋止面再拜稽首使者宣制蕃主進

受幣退復位以幣授左右又再拜稽首使者降出立於

門外之西東面蕃主送於門之外西面止使者揖以俱入

讓升蕃主先升東階上西面使者升西階上東面蕃主

以土物賃使者使者再拜受蕃主再拜送物使者降出
蕃主從出門外皆如初蕃主再拜送使者還蕃主入鴻
臚迎引詣朝堂依方北面立所司奏聞舍人承敕出稱
有敕蕃主再拜宣勞又再拜乃就館皇帝遣使戒蕃主
見日如勞禮宣制曰某日某主見蕃主拜稽首使者降
出蕃主送蕃主奉見前一日尚舍奉御設御幄於太極
殿南向蕃主坐於西南東向守宮設次太樂令展宮縣
設舉麾位於上下鼓吹令設十二案乘黃令陳車輶尚

輦奉御陳輿輦典儀設蕃主立位於縣南道西北面蕃國諸官之位於其後重行北面西上典儀位于縣之東北贊者二人在南差退俱西面諸衛各勒部屯門列黃麾仗所司迎引蕃主至承天門外就次本司入奏鉞戟近仗皆入典儀帥贊者先入就位侍中版奏請中嚴諸侍衛之官及符寶郎詣閣奉迎蕃主及其屬各立於閣外西廂東面侍中版奏外辦皇帝服通天冠絳紗袍乘輿以出舍人引蕃主入門舒和之樂作典儀曰再拜蕃

主再拜稽首侍中承制降詣蕃主西北東面曰有制蕃
主再拜稽首乃宣制又再拜稽首侍中還奏承制降勞
敕升座蕃主再拜稽首升座侍中承制勞問蕃主俛伏
避席將下拜侍中承制曰無下拜蕃主復位拜而對侍
中還奏承制勞還館蕃主降復縣南位再拜稽首其官
屬勞以舍人與其主俱出侍中奏禮畢皇帝興若蕃國
遣使奉表幣其勞及戒見皆如蕃國主庭實陳於客前
中書侍郎受表置於案至西階以表升有司各率其屬

受其幣焉其宴蕃國主及其使皆如見禮皇帝已即御坐蕃主入其有獻物陳於其前侍中承制降敕蕃主升坐蕃主再拜奉贊曰某國蕃臣某敢獻壤奠侍中升奏承旨曰朕其受之侍中降於蕃主東北西面稱有制蕃主再拜乃宣制又再拜以贊授侍中以授有司有司受其餘幣俱以東舍人承旨降敕就坐蕃國諸官俱再拜應升殿者自西階其不升殿者分別立於廊下席後典儀曰就坐階下贊者承傳皆就坐太樂令引歌者及琴

瑟至階脫履升坐其笙管者就階間北面立尚食奉御進酒至階典儀曰酒至興階下贊者承傳皆俛伏興立殿中監及階省酒尚食奉御進酒皇帝舉酒良醞令行酒典儀曰再拜階下贊者承傳皆再拜受觶皇帝初舉酒登歌作昭和三終尚食奉御受虛觶奠于坫酒三行尚食奉御進食典儀曰食至興階下贊者承傳皆興立殿中監及階省案尚食奉御品嘗食以次進太官令行蕃主以下食案典儀曰就坐階下贊者承傳皆就坐皇

帝乃飯蕃主以下皆飯徹案又行酒遂設皮蓋二舞以次入作食畢蕃主以下復位于縣南皆再拜若有筐篚舍人前承旨降宣敕蕃主以下又再拜乃出其三曰軍禮皇帝親征纂嚴前期一日有司設御幄於太極殿南向文武羣官次於殿庭東西每等異位重行北向乘黃令陳革輶以下車旗於庭其日未明諸衛勒所部列黃麾仗平明侍臣將帥從行之官皆平巾幘袴褶留守之官公服就次上水五刻侍中版奏請中嚴鉞戟近仗列

于庭三刻羣官就位諸侍臣詣閣奉迎侍中版奏外辨
皇帝服武弁御輿以出即御座典儀曰再拜在位者皆
再拜中書令承旨敕百寮羣官出侍中跪奏禮畢皇帝
入自東房侍臣從至閣乃襯于昊天上帝前一日皇帝
清齋於太極殿諸豫告之官侍臣軍將與在位者皆清
齋一日其日皇帝服武弁乘革輶備大駕至于壇所其
牲二及玉幣皆以蒼尊以太尊山罍各二其獻一皇帝
已飲福諸軍將升自東階立于神座前北向西上飲福

受胙將軍之次在外壇南門之外道東西向北上其即事之位在縣南北面每等異位重行西上其奠玉帛進熟飲福望燎皆如南郊其宜于社造于廟皆各如其禮而一獻軍將飲福于太稷廟則皇考之室其凱旋則陳俘馘於廟南門之外軍實陳于其後其解嚴皇帝服通天冠絳紗袍羣臣再拜以退而無所詔其餘皆如纂嚴若禡于所征之地則為壇再重以熊席祀軒轅氏兵部建兩旗于外壇南門之外陳甲胄弓矢于神位之側植

稍于其後尊以犧象山罍各二饌以特牲皇帝服武弁
羣臣戎服三獻其接神者皆如常祀瘞而不燎其軍將
之位如襯其輶于國門右校委土於國門外為輶又為
瘞塗于神位西北太祝布神位於輶前南向太官令帥
宰人割羊郊社之屬設尊罍篚冕於神左俱右向置幣
於尊所皇帝將至太祝立於罍洗東南西向再拜取幣
進跪奠於神進饌者薦脯醢加羊於輶西首太祝盥手
洗爵酌酒進跪奠於神興少退北向立讀祝太祝再拜

少頃帥齋郎奉幣爵酒饌宰人舉羊肆解之太祝并載埋於壇執尊者徹罍篚席駕至權停太祝以爵酌酒授太僕卿左併轡右受酒祭兩軺及軺前乃飲授爵駕轡輒而行其所過山川遣官告以一獻若遣將出征則皆有司行事賊平而宣露布其日守宮量設羣官次露布至兵部侍郎奉以奏聞承制集文武羣官客使於東朝堂各服其服奉禮設版位於其前近南文東武西重行北向又設客使之位設中書令位於羣官之北南面吏

部兵部贊羣官客使謁者引就位中書令受露布置於
案令史二人絳公服對舉之以從中書令出就南面位
持案者立於西南東面中書令取露布稱有制羣官客
使皆再拜遂宣之又再拜舞蹈又再拜兵部尚書進受
露布退復位兵部侍郎前受之中書令入羣官客使各
還次仲冬之月講武於都外前期十有一日所司奏請
講武兵部承詔遂命將帥簡軍士除地為場方一千二
百步四出為和門又為步騎六軍營域左右廂各為三

軍北上中間相去三百步立五表表間五十步為二軍進止之節別壇地於北廂南向前三日尚舍奉御設大次於壇前一日講武將帥及士卒集於壇所建旗為和門如方色都壇之中及四角皆建五米牙旗旗鼓甲仗大將以下各有統帥大將被甲乘馬教習士衆少者在前長者在後其還則反之長者持弓矢短者持戈矛力者持旌勇者持鉦鼓刀楯為前行持矟者次之弓箭者為後使其習見旌旗金鼓之節旗臥則跪旗舉則起講

武之日未明十刻而嚴五刻而甲步軍為直陣以俟大將立旗鼓之下六軍各鼓十二鉦一大角四未明七刻鼓一嚴侍中奏開宮殿門及城門五刻再嚴侍中版奏請中嚴文武官應從者俱先至文武官皆公服所司為小駕二刻三嚴諸衛各督其隊與鋏戟以次入陳於殿庭皇帝乘革輶至壇所兵部尚書介胄乘馬奉引入自此門至兩步軍之北南向黃門侍郎請降輶乃入大次兵部尚書停於東廂西向領軍減小駕騎士立於都壇

之西周侍臣左右立於大次之前北上九品以上皆公服東西在侍臣之外十步所重行北上諸州使人及蕃客先集於北門外東方南方立於道東西方北立於道西北上駕將至奉禮曰可拜在位者皆再拜皇帝入次謁者引諸州使人鴻臚引蕃客東方南方立於大次東北西方北立於西北觀者立於都壇騎士仗外四周然後講武吹大角三通中軍將各以鞬令鼓二軍俱擊鼓三鼓有司偃旗步士皆跪諸帥果毅以上各集於

其中軍左廂中軍大將立於旗鼓之東西面諸軍將立
於其南右廂中軍大將立於旗鼓之西東面諸軍將立
於其南北面以聽大將誓左右三軍各長史二人振鐸
分循諸果毅各以誓詞告其所部遂擊鼓有司舉旗士
衆皆起行及表擊鉦乃止又擊三鼓有司偃旗士衆皆
跪又擊鼓有司舉旗士衆皆起驟及表乃止東軍一鼓
舉青旗為直陣西軍亦鼓舉白旗為方陣以應次西軍
鼓舉赤旗為銳陣東軍亦鼓舉黑旗為曲陣以應次東

軍鼓舉黃旗為圜陣西軍亦鼓舉青旗為直陣以應次
西軍鼓舉白旗為方陣東軍亦鼓舉赤旗為銳陣以應
次東軍鼓舉黑旗為曲陣西軍亦鼓舉黃旗為圜陣以
應凡陣先舉者為客後舉者為主每變陣二軍各選刀
楯五十人挑戰第一第二挑戰迭為勇怯之狀第三挑
戰為敵均之勢第四第五挑戰為勝敗之形每將變陣
先鼓而直陣然後變從餘陣之法既已兩軍俱為直陣
又擊三鼓有司偃旗士衆皆跪又聲鼓舉旗士衆皆起

騎馳徒步左右軍俱至中表相擬擊而還每退至一行
表跪起如前遂復其初侍中跪奏請觀騎軍承制曰可
二軍騎軍皆如步軍之法每陣各八騎挑戰五陣畢大
擊鼓而前盤馬相擬擊而罷遂振旅侍中跪奏稱侍中
臣某言禮畢乃還皇帝狩田之禮亦以仲冬前期兵部
集衆庶修田法虞部表所田之野建旗於其後前一日
諸將帥士集于旗下質明弊旗後至者罰兵部申田令
遂圍田其兩翼之將皆建旗及夜布圍闕其南面駕至

田所皇帝鼓行入圍鼓吹令以鼓六十陳於皇帝東南西向六十陳於西南東向皆乘馬各備簫角諸將皆鼓行赴圍乃設驅逆之騎皇帝乘馬南向有司斂大綏以從諸公王以下皆乘馬帶弓矢陳於前後所司之屬又斂小綏以從乃驅獸出前初一驅過有司整飭弓矢以前再驅過有司奉進弓矢三驅過皇帝乃從禽左而射之每驅必三獸以上皇帝發抗大綏然後公王發抗小綏驅逆之騎止然後百姓獵凡射獸自左而射之達於右

鵠為上射達右耳本為次射左脾達於右骭為下射羣獸相從不盡殺已被射者不重射不射其面不翦其毛凡出表者不逐之田將畢虞部建旗於田內乃雷擊駕鼓及諸將之鼓士從謠呼諸得禽獸旗下致其左耳大獸公之小獸私之其上者供宗廟次者供賓客下者充庖厨乃命有司餩獸於四郊以獸告至於廟社射前一日太樂令設宮縣之樂鼓吹令設十二案於射殿之庭東面縣在東階東西面縣在西階西南北二縣及登歌

廣開中央避射位張熊侯去殿九十步設之於侯西十
步北十步設五福庭前少西布侍射者位於西階前東
面北上布司馬位於侍射位之南東面布獲者位之東
東面布侍射者射位於殿階下當前少西橫布南面侍
射者弓矢俟於西門外陳賞物於東階下少東置罰豐
於西階下少西設罰尊於西階南北以殿深設筵於尊
西南肆實爵加幕其日質明皇帝服武弁文武官俱公
服典謁引入見樂作如元會之儀酒二徧侍中一人奏

稱有司謹具請射侍中一人前承制退稱制曰可王公
以下皆降文官立於東階下西面北上武官立於西階
下於射之後東面北上持鉞隊羣立於兩邊千牛備身
二人奉御弓及矢立於東階上西面執弓者在北又設
坫於執弓者之前又置御決拾筭於其上獲者持旌自
之南行當侯東行至侯負侯北面立侍射者出西門外
取弓矢兩手奉弓指乘矢帶入立於殿下射位西東西面
司馬奉弓自西階升當西楹前南面揮弓命獲者以旌

去侯西行十步北行至之止司馬降自西階復位千牛
中郎一人奉決拾以筈千牛將軍奉弓千牛郎將奉矢
進立於御榻東少南西向郎將跪奠筈於御榻前少東
遂拂以巾取決興贊設決又跪取拾興贊設拾以筈退
奠於坫千牛將軍北面張弓以袂順左右隈上再下一
弓左右隈謂弓面上下以衣袂摩拭上面再下面一西面左執弣右執簫以進千
牛郎將以巾拂矢進一一供御欲射協律郎舉麾先奏
鼓吹及奏樂騶虞五節御反射第一矢與第六節相應

第二矢與第七節相應以至九節協律郎偃麾樂止千牛將軍以矢行奏中曰獲下曰留上曰揚左曰左方右曰右方過侯左右謂矢短不及侯揚謂矢偏不正留謂矢短不及侯揚謂矢偏不正千牛將軍於御座東西面受弓退付千牛於東階上千牛郎將以筈受決拾奠於坫侍射者進升射席北面立左旋東面張弓南面挾矢協律郎舉麾乃作樂不作鼓吹樂奏狸首三節然後發矢若侍射者多則齊發第一發與第四節相應第二發與第五節相應以至七節協律郎偃麾樂止弓右

旋東西弛弓如面立乃退復西階下立司馬升自西階
自西楹前南面揮弓命取矢取矢者以御矢付于牛於
東階下侍射者釋弓於位庭前北面東上有司奏請賞
罰侍中稱制曰可有司立福之西東面監唱射矢取矢
者各唱中者姓名中者立於東階下西面北上不中者
立於西階下東面北上俱再拜有司於東階下以付賞
物酌者於罰尊西東面跪奠爵於豐上不中者進豐南
北面跪取爵立飲卒爵奠豐下酌者北面跪取虛爵酌

奠不中者以次繼飲皆如初典謁引王公以下及侍射
者皆庭前北面相對為首再拜訖引出持鉞隊復位皇
帝入奏樂警蹕有司以弓矢出中門外侍射者出若特
射無侍射之人則不設福不陳賞罰若燕遊小射則常
服不陳樂縣不行會禮不合朔伐鼓其日前二刻郊社
令及門僕赤幘絳衣守四門令巡門監察鼓吹令平巾
幘袴褶帥工人以方色執麾旒分置四門屋下設龍蛇
鼓於右東門者立於北塾南面南門者立於東塾西面

西門者立於南塾北面北門者立於西塾東面隊正一人平巾幘袴褶執刀帥衛士五人執五兵立於鼓外矛在東戟在南斧鉞在西稍在北郊社令立攢於社壇四隅以朱絲繩縈之太史一人赤幘赤衣立於社壇北向日觀變黃麾次之龍鼓一次之在北弓一矢四次之諸兵鼓立候變日有變史官曰祥有變工人舉麾龍鼓發聲如雷史官曰止乃止其日皇帝素服避正殿百官廢務自府史以上皆素服各於其聽事之前重行每等異

位向日立明復而止貞元三年八月日有食之有司將
伐鼓德宗不許太常卿董晉言伐鼓所以責陰而助陽
也請聽有司依經伐鼓不報由是其禮遂廢大讌之禮
選人年十二以上十六以下為辰子假面赤布袴褶二
十四人為一隊六人為列執事十二人赤幘赤衣麻鞭
工人二十二人其一人方相氏假面黃金四目蒙熊皮黑衣
朱裳右執戈左執楯其一人為唱帥假面皮衣執棒鼓角
各十合為一隊隊別鼓吹令一人太卜令一人各監所

部巫師二人以逐惡鬼于禁中有司預備每門雄雞及
酒擬於宮城正門皇城諸門磔禳設祭太祝一人齋郎
三人右校為瘞壘各於皇城中門外之右前一日之夕
讃者赴集所具其器服以待事其日未明諸衛依時刻
勒所部屯門列仗近仗入陳於階鼓吹令率讃者各集
於宮門外內侍詣皇帝所御殿前奏振子備請逐疫出
命寺伯六人分引讃者於長樂門永安門以入至左右
上閣鼓譟以進方相氏執戈揚楯唱振子和曰甲作食

凶脯胃食虎雄伯食魅騰簡食不祥攬諸食咎伯竒食
夢彊梁祖明共食碟死寄生委隨食觀錯斷食巨窮奇
騰根共食蠱凡使一十二神追惡凶赫汝軀拉汝幹節
解汝肉抽汝肺腸汝不急去後者為糧周呼訖前後鼓
謠而出諸隊各趨順天門以出分詣諸城門出郭而止
讎者將出祝布神席當中門南向出訖宰手齋郎齋牲
勾磔之神席之西籍以席北首齋郎酌清酒太祝受奠
之祝史持版於坐右跪讀祝文曰維某年歲次月朔日

天子遣太祝臣姓名昭告于太陰之神興奠版于席乃
舉牲并酒瘞於壇

唐書卷十六

唐書卷十六考證

禮樂志六蕃主入門舒和之樂作○沈炳震曰按通典
皇帝將出仗動大樂令撞黃鐘之鐘右五鐘皆應協
律舉麾擊柷奏太和之樂及姑洗之音皇帝即御座
偃麾憂敔樂止皇帝出入奏樂新書雖發凡于樂志
然于此節而存舒和之樂文則似皇帝即座不作樂
而蕃主入門始作樂矣理似未長臣酉按此志賓禮
所重在蕃主入門作樂至皇帝出入奏樂已發凡于

樂志矣去彼存此史體乃合炳震之說未可從
立福之西東西。通典作東西面

唐書卷十六考證

謹案卷十四第二頁前二行其印齒如璽案通典

齒作函與此異

第二頁後八行刻填金文刊本填訛而據通典改
第十一頁後三行藉田祭先農刊本祭訛豪據王
應麟玉海卷七十六引此志改

卷十五第十二頁前八行贈諸弟子爵公侯案此
下所叙諸弟子名字封邑與通典多異又此及
會要止七十七人通典多遽瑗林放陳亢申張

琴牢琴張六人合八十三人未詳孰是

卷十六第一頁後六行蕃主進受幣列本幣訛命

據通典改

第一頁後七行蕃主送於門之外西面止列本脫
面字據通典增

第二頁前一行以土物賚使者刊本土訛主據通
典改

第六頁後三行祭兩軌及軌前乃飲刊本軌訛軌

據禮記少儀及通典改

第十頁後八行自左而射之案詩車攻毛傳左下
有牒字此反通典俱無


第十一頁前一行為上射下通典有達左耳本為
中射七字此志無之蓋仍詩毛傳之舊

第十五頁前七行右執戈左執楯刊本脫執戈左

三字據通典增

欽定四庫全書





總校官庶吉士臣侍朝

校對官中書臣馮培

謄錄監生臣張駿

欽定四庫全書叢要

史部

唐書卷十九

七至九

詳校官編修臣王天祿



欽定四庫全書

唐書卷五十一
一百四十四

史部

唐書卷十七

宋 翰 林 學 士 歐 陽 修 撰

禮樂志第七

四
嘉禮皇帝加元服有司卜日告于天地宗廟前一日尚舍設席於太極殿中楹之間莞筵紛純加藻席繙純加次席黼純有司設次展縣設案陳車輦設文官五品以上位於縣東武官於縣西六品以下皆於橫街之

南北上朝集使分方於文武官當品之下諸親位於四品五品之中皇宗親在東異姓親在西藩客分方各於朝集使六品之南諸州使人於朝集使九品之後又設太師太尉位於橫街之南道東北面西上典儀於縣東北贊者二人在南少退俱西向又設門外位於東西朝堂如元日其日侍中版奏請中嚴太樂令鼓吹令帥工人入就位有司設壘洗於阼階東南設席於東房內近西張帷於東序外殿中監陳衣服於內席東領緇纏玉

簪及櫛三物同箱在服南又設莞筵一紛純加藻席繙
純加次席黼純在南尚食實醴尊於東序外帷內坫在
尊北實角觶柵各一饌陳於尊西籩豆各十二俎三在
籩豆之北設罍洗於尊東袞冕玉導置於箱太常博士
一人立於西階下東面諸侍衛之官俱詣閣奉迎典儀
帥贊者及羣官以次入就位太常博士引太常卿升西
階立於西房外當戶北向侍中版奏外辦皇帝服空頂
黑介幘絳紗袍出自西房即御座立太師太尉入就位

典儀曰再拜贊者承傳在位者皆再拜太師升自西階立於西階上東面太尉詣阼階下罍洗盥手升自東階詣東房取纏櫛箱進跪奠於御座西端太師詣御座前跪奏曰坐皇帝坐太尉當前少左跪脫幘置於箱櫛畢設纏輿少西東面立太師降盥受冕右執頂左執前升自西階當前少左祝曰令月吉日始加元服壽考惟祺以介景福乃跪冠輿復西階上位太尉前少左跪設簪結纓輿復位皇帝輿適東房殿中監徹櫛纏箱以退皇

帝袞服出即席南向坐太尉諸序外帷內盥手洗觶酌醴加柅覆之面葉立於序內南面太師進受醴面柄前北向祝曰甘醴唯厚嘉薦令芳承天之休壽考不忘退降立於西階下東面將祝殿中監率進饌者奉饌設於前皇帝左執觶右取脯擣於醢祭於籩豆之間太尉取肺一以進皇帝奠觶於薦西受肺却左執本右絕末以祭上左手躋之授太尉太尉加於俎降立於太師之南皇帝帨手取觶以柅祭醴啐醴建柅奠觶於薦東太師

太尉復橫街南位典儀曰再拜贊者承傳在位者皆再拜太師太尉出侍中前跪奏禮畢皇帝興入自東房在位者以次出皇太子加元服所司豫奏司徒一人為賓卿一人為贊冠吏部承以戒之前一日尚舍設御幄於太極殿有司設羣官之次位展縣設案陳車輿皆如皇帝之冠設賓受命位於橫街南道東贊冠位於其後少東皆北面又設文武官門外位於順天門外道東西其日侍中奏請中嚴羣官有司皆就位賓贊入立於太極

門外道東西面黃門侍郎引主節持幡節中書侍郎引
制書案立於樂縣東南西面北上侍中奏外辦皇帝服
通天冠絳紗袍乘輿出自西房即御座賓贊入就位典
儀曰再拜在位皆再拜侍中及舍人前承制侍中降至
賓前稱有制公再拜侍中曰將加冠於某之首公其將
事公少進北面再拜稽首辭曰臣不敏恐不能供事敢
辭侍中升奏又承制降稱制旨公其將事無辭公再拜
侍中舍人至卿前稱敕旨卿再拜侍中曰將加冠於某

之首卿宜贊冠卿再拜黃門侍郎執節立於賓東北西面賓再拜受節付于主節又再拜中書侍郎取制書立賓東北西面賓再拜受制書又再拜典儀曰再拜贊者承傳在位皆再拜賓贊出皇帝降坐入自東房在位者以次出初賓贊出門以制書置於案引以幡節威儀鏡吹及九品以上皆詣東宮朝堂冠前一日衛尉設賓次於重明門外道西南向贊冠於其西南又設次於門內道西以待賓贊又設皇太子位於閣外道東西向三師

位於道西三少位於其南少退俱東向又設軒縣於庭
皇太子受制位於縣北解劍席於東北皆北面冠日平
明宮臣皆朝服其餘公服集於重明門外朝堂宗正卿
乘車侍從詣左春坊權停左右二率各勒所部屯門列
仗左庶子版奏請中嚴羣官有司入就位設罍洗於東
階東南設冠席於殿上東壁下少南西向賓席於西階
上東向主人席於皇太子席西南西向三師席於冠席
南張帷於東序內設褥席於帷中又張帷於序外冠席

內直郎陳服於帷內東領北上哀冕金飾象笏遠游冠
緇布冠服玄衣素裳素韞白紗中單青領襟襍裾履襪
革帶大帶笏緇纓犀簪二物同箱在服南櫛實於箱又
在南莞筵四藻席四又在南良醞令實側尊旣醴於序
外帷內設罍洗於尊東實巾一角解柶各一大官令實
饌豆九籩九於尊西俎三在豆北哀冕遠游三梁冠黑
介幘緇布冠青組纓屬於冠冠冕各一箱奉禮郎三人
各執立於西階之西東面北上主人贊冠者宗正卿為
主人庶子

為贊

升詣東序帷內少北戶東西立典謁引羣官以次

入就位初賓贊入次左庶子版奏外辦通事舍人引三

師等入就閣外道西位東面立皇太子空頂黑介幘雙

童髻綵衣紫袴褶織成標領綠紳烏皮履乘輿以出洗

馬迎於閣門外左庶子請降輿洗馬引之道東位西向

立左庶子請再拜三師三少答拜乃就階東南位三師

在前三少在後千牛二人夾左右其餘仗衛列於師保

之外皇太子乃出迎賓至阼階東西面立宗正卿立於

門東西面賓立於西東面宗正卿再拜賓不答拜賓入主人從入立於縣東北西面賓入贊冠者從賓詣殿階間南面贊冠者立於賓西南東面節在賓東少南西面制案在贊冠西南東面賓執制皇太子詣受制位北面立主節脫節衣賓稱有制皇太子再拜宣詔曰有制皇太子某吉日元服率由舊章命太尉某就宮展禮皇太子再拜少傅進詣賓前受制書以授皇太子付于庶子皇太子升東階入于東序帷內近北南面立賓升西階

及宗正卿各立席後初賓升贊冠者詣壘洗盥手升自東階帷內於主人贊冠之南俱西面主人贊冠者引皇太子出立於席東西面賓贊冠者取纏櫛二箱坐奠於筵皇太子進升筵西面坐賓之贊冠者東面坐脫幘置於箱櫛畢設纏輿少北南面立冠緇布冠升賓降一等受之右執頂左執前進東向立祝曰令月吉日始加元服棄厥幼志慎其成德壽考惟祺以介景福乃跪冠輿復位皇太子東面立賓揖皇太子贊冠者引適東序帷

內服玄衣素裳之服以出立於席東西面賓揖皇太子
升筵西向坐賓之贊冠者進跪脫緇布冠置於箱興復
位賓降二等受遠游冠右執頂左執前進祝曰吉月令
辰乃申嘉服克敬威儀式昭厥德眉壽萬歲永壽胡福
乃跪冠興復位皇太子興賓揖皇太子贊冠者引適東
序帷內朝服以出立於席東西面賓揖皇太子升筵坐
賓之贊冠者跪脫遠游冠興復位賓降三等受冕右執
頂左執前進祝曰以歲之正以月之令咸加其服以成

厥德萬壽無疆承天之慶乃跪冠興復位每冠皆贊冠者跪設簪結纓皇太子興賓揖皇太子適東序服袞冕之服以出立於席東西面贊冠者徹纓櫛箱以入又取筵入於帷內主人贊冠者又設醴皇太子席於室戶西南向下莞上藻賓之贊冠者於東序外帷內盥手洗觶典膳郎酌醴加柵覆之面柄授贊冠立於序內南面賓揖皇太子就筵西南面立賓進受醴加柵面柄進北向立祝曰甘醴唯厚嘉薦令芳拜受祭之以定厥祥承天

之休壽考不忘皇太子拜受觶賓復位東面答拜贊冠者與進饌者奉饌設於筵前皇太子升筵坐左執觶右取脯擣於醢祭於籩豆之間贊冠者取韭菹遍擣於豆以授皇太子又祭於籩豆之間贊冠者取肺一以授皇太子皇太子奠觶於薦西興受肺郤左手執本坐繚右手絕末以祭上左手躋之興以授贊冠者加於俎皇太子坐帨手取觶以柵祭醴三始拔一祭又拔再祭加柵於觶面葉興筵末坐啐醴建柵興降筵西南面坐奠觶

再拜執觶興賓答拜皇太子降立於西階之東南面賓
降立於西階之西少南贊冠隨降立於賓西南皆東面
賓少進字之祝曰禮儀既備令月吉日昭告厥字君子
攸宜宜之於嘏永受保之奉敕字某皇太子再拜曰某
雖不敏敢不祗奉及再拜洗馬引太子降阼階位三師
在南北面三少在北南面立皇太子西面再拜三師等
各再拜以出典儀曰再拜贊者承傳在位者皆再拜左
庶子前稱禮畢皇太子乘輿以入侍臣從至閣賓贊及

宗正卿出就會皇子冠前三日本司帥其屬筮日筮賓於聽事前二日主人至賓之門外次東面賓立於阼階下西面僨者進於左北面受命出立於門東西面曰敢請事主人曰皇子某王將加冠請某公教之僨者入告賓出立於門左西面再拜主人答拜主人曰皇子某王將加冠願某公教之賓曰某不敏恐不能共事敢辭主人曰某猶願某公教之賓曰王重有命其敢不從主人再拜而還賓拜送命贊冠者亦如之冠之日夙興設洗

於阼階東南席於東房內西墉下陳衣於席東領北上
袞冕遠游冠緇布冠緇纏犀簪櫛寶於箱在服南莞筵
藻席各三在南設尊於房戶之外西兩甌玄酒在西加
勺羃設坫於尊東置二爵於坫加羃豆十籩十在服北
俎三在籩豆之北質明賓贊至於主人大門外之次遠
游三梁緇布冠各一箱各一人執之侍於西階之西東
面北上設主人之席於阼階上西面賓席於西階上東
面皇子席於室戶東房戶西南面俱下莞上藻主人立

於阼階下當東房西面諸親立於罍洗東南西面北上
賓者立於門內道南北面皇子雙童髻空頂幘綵袴褶
錦紳烏皮履立於房內南面主人贊冠者立於房內戶
東西面賓及贊冠者出立於門西贊冠者少退俱東西
北上賓者受命於主人出立於門東西面曰敢請事賓
曰皇子某王將加冠某謹應命賓者入告主人出迎賓
西面再拜賓答拜主人揖贊冠者贊冠者報揖主人又
揖賓賓報主人入賓贊冠者以次入及內門主人揖賓

賓入贊冠者從之至內畱將曲揖賓報揖至階主人立於階東西面賓立於階西東面主人曰請公升賓曰某備將事敢辭主人曰固請公升賓曰某敢固辭主人曰終請公升賓曰某敢終辭主人升自阼階立於席東西向賓升自西階立於席西東向贊冠者及庭盥於洗升自西階入於東房立於主人贊冠者之南俱西面主人贊冠者引皇子出立於房戶外西南面賓之贊冠者取繩櫛簪箱跪奠於皇子筵東端興席東少北南面立賓

揖皇子賓主俱即坐皇子進升席南面坐賓之贊冠者
進筵前北面跪脫雙童髻置於箱櫛畢設纓賓降盥主
從降賓東面辭曰願主不降主人曰公降辱敢不從降
賓既盥詣西階賓主一揖一讓升主人立於席後西面
賓立於西階上東執繙布冠者升賓降一等受之右執
頂左執前北面跪冠興復西階上席後東面立皇子興
賓揖皇子適房賓主俱坐皇子服青衣素裳之服出房
戶西南面立賓揖皇子皇子進立於席後南面賓降盥

主人從降辭對如初賓跪取爵於筵興洗詣西階賓主一揖一讓升坐主人立於席後西面賓詣酒尊所酌酒進皇子筵前北向立祝曰吉酒既清嘉薦鬯時始加元服兄弟具來孝友時格永乃保之皇子筵西拜爵賓復西階上東面答拜執饌者薦籩豆於皇子筵前皇子升座左執爵右執脯擩於醯祭於籩豆之間祭酒興筵末坐啐酒執爵興降筵奠爵再拜執爵興賓答拜冠者升筵跪奠爵於薦東興立於筵西南面執饌者徹薦爵賓

揖皇子皇子進升筵南向坐賓之贊冠者跪脫緇布冠置於箱賓降二等受遠游冠冠之皇子興賓揖皇子適房賓主俱坐皇子服朝服出房戶西南面立賓主俱興賓揖皇子皇子進立於席後南面賓諸尊所取爵酌酒進皇子筵前北向立祝曰旨酒既湑嘉薦伊脯乃申其服禮儀有序祭此嘉爵承天之祐皇子筵西拜受爵祭饌如初禮賓揖皇子進升席南面坐賓之贊冠者跪脫進賢冠賓降三等受冕冠之每冠皆贊冠者設簪結纓

皇子興賓揖皇子適房服哀冕以出房戶西南面賓揖
皇子進立於席後南面賓詣酒尊所取爵酌酒進皇子
祝曰吉酒令芳邉豆有楚咸加其服殼升折俎承天之
慶受福無疆皇子筵西拜受爵執饌者薦邉豆設俎於
其南皇子升筵坐執爵祭脯醢贊冠者取肺一以授皇
子皇子奠爵於薦西興受坐祭左手躋之興加於俎皇
子坐況手執爵祭酒興筵末坐啐酒降筵西南面坐奠
爵再拜執爵興賓答拜皇子升筵坐奠爵於薦東興贊

冠者引皇子降立於西階之東南面初皇子降賓降自西階直西序東面立主人降自東階直東序西面立賓少進字之曰禮儀既備今月吉日昭告其字爰字孔嘉君子攸宜宜之于嘏永受保之曰孟某甫仲叔季唯其所當皇子曰某雖不敏夙夜祇奉賓出主人送於內門外主人西面請賓曰公辱執事請禮從者賓曰某既得將事敢辭主人曰敢固以請賓曰某辭不得命敢不從賓就次主人入初賓出皇子東面見諸親拜之皇子答

拜皇子入見內外諸尊於別所賓主既釋服改設席訖賓贊俱出次立於門西主人出揖賓賓報揖主人先入賓贊從之至階一揖一讓升坐俱坐會訖賓立於西階上贊冠者在北少退俱東面主人立於東階上西面掌事者奉束帛之篚升授主人於序端主人執篚少進西面立又掌事者奉幣篚升立於主人後幣篚升牽馬者牽兩馬入陳於門內三分庭一在南北首西上賓還西階上北面再拜主人進立於楹間贊冠者立於賓左少

退俱北面再拜主人南面賓贊進立於主人之右俱南面東上主人授幣賓受之退復位於主人授幣掌事者又以幣籜授贊冠者主人還阼階上北面拜送賓贊降自西階從者訝受幣賓當庭寶東面揖出牽馬者從出從者訝受馬於門外賓降主人降送賓於大門西面再拜若諸臣之嫡子三加皆祝而冠又祝而酌又祝而字庶子三加既加然後酌而祝之又祝而字其始冠皆繙布再加皆進賢其三加一品之予以袞冕二品之予以

鷩冕三品之子以毳冕四品之子以繩冕五品之子以
玄冕六品至于九品之子以爵弁其服從之其即席而
冠也嫡子西面庶子南面其筮日筮賓贊遂戒之及其
所以冠之禮皆如親王

唐書卷十七

唐書卷十七 考證

禮樂志七加藻席緇純○緇通典作績

侍中○此下通典有退字

侍中曰○沈炳震曰當作舍人曰

卿再拜○此句下通典有舍人退三字

唐書卷十七考證

欽定四庫全書
唐書卷五十一
五百四十五

史部

唐書卷十八

宋 翰 林 學 士 歐 陽 修 撰

禮樂志第八

皇帝納皇后制命太尉為使宗正卿為副吏部承以戒
之前一日有司展縣設按陳車輿於太極殿廷如元日
文武九品朝集蕃客之位皆如冠禮設使者受命位於
大橫街南道東西上副少退北面侍中請中嚴羣臣入

就位使副入立於門外道東西面黃門侍郎引幡節中書侍郎引制書按立於左延明門內道北西面北上乃奏外辨皇帝袞冕御輿出自西房即御座使副入就位典儀曰再拜在位者皆再拜侍中前承制降詣使者東北西面曰有制使副再拜侍中宣制曰納某官某氏女為皇后命公等持節行納采等禮使副又拜主節立於使者東北西面以節授黃門侍郎侍郎以授使者付於主節立於後中書侍郎引制書按立於使者東北以制

書授使者置於案典儀曰再拜在位者皆再拜使副出持節者前導持按者次之侍中奏禮畢皇帝入在位者以次出初使副乘輶鼓吹備而不作從者乘車以從其制書以油絡網犧車載之其日大昕使副至於次主人受於廟若寢布神席於室戶外之西莞筵紛純加藻席畫純南向右彫几使副立於門西北上持幡節者立於北少退制按立於南執鴈者又在其南皆東面主人立於大門內西面賓者北面受命於左出立於門東西面

曰敢請事使者曰某奉制納采賓者入告主人曰臣某之女若如人既蒙制訪臣某不敢辭賓者出告入引主人出迎使者於大門外之南北面再拜使者不答主人揖使副先入至於階使副入導以幡節按鴈從之幡節立西階之西東面使者由西階升立於兩楹間南面副在西南持按及執鴈者又在西南皆東面主人升阼階當使者前北面立持按者以按進授使者以制書持節者脫節衣使者曰有制主人再拜宣制主人降諸階間北面再拜

稽首升進北面受制書以授左右使者授鴈主人再拜
進受鴈以授左右賓者引答表按進立於主人後少西
以表授主人主人進授使者退復位再拜節加衣謁者
引使副降自西階以出制文以版長一尺二寸博四寸
厚八分后家答版亦如之問名使者既出遂立於內門
外之西東面主人立於內門內東廂西面賓者出請事
使者曰將加卜筮奉制問名賓者入告主人曰臣某之
子若如人既蒙制訪臣某不敢辭賓者出告入引主人

出迎使者以入授主人以制書答表皆如納采使副降
自西階以出立於內門外之西東面主人立於東階下
西向賓者出請事使者曰禮畢賓者入告主人曰某公
奉制至於某之室某有先人之禮請禮從者賓者出告
使者曰某既得將事敢辭賓者入告主人曰先人之禮
敢固以請賓者出告使者曰某辭不得命敢不從賓者
入告遂引主人升立於序端掌事者徹几設二筵東上
設瓶醴於東房西墉下加杓幕坫在尊北實解二角柵

一籩豆各一實以脯醢在坫北又設洗於東南主人降迎使者西面揖先入使副入門而左主人入門而右至階主人曰請某位升使者曰某敢辭主人又曰固請某使升使者曰某敢固辭主人又曰終請某位升使者曰敢終辭主人升自阼階使副升自西階北面立主人阼階上北面再拜受几於序端掌事者內拂几三奉兩端西北向以進主人東南向外拂几三振袂內執之掌事者一人又執几以從主人進西北向使者序進迎受於

筵前東南向以俟主人還東階上北面再拜送使者以
几進北面跪各設於坐左退於西階上北面東上答
拜立於階西東面南上贊者二人俱升取觶降盥手洗
觶升實醴加柵於觶覆之面葉出房南面主人受醴面
柄進使者筵前西北面立又贊者執觶以從使者西階
上北面各一拜序進筵前東南面主人又以次受醴使
者受俱復西階上位主人退復東階上北面一拜送掌
事者以次薦脯醢於筵前使者各進外筵皆坐左執觶

右取脯孺於醢祭於籩豆之間各以柵祭醴三始扢一
祭又扢再祭興各以柵薰諸禪上蹴降筵於西階上俱
北面坐啐醴建柵各奠禪於薦遂拜執禪與主人答拜
使者進升筵坐各奠禪於薦東降筵序立於西階上東
面南上掌事者牽馬入陳於門內三分庭一在南北首
西上又掌事者奉幣篚升自東階以授主人受於序端
進西面立掌事者一人又奉幣篚立於主人之後使者
西階上俱北面再拜主人進詣楹間南面立使者序進

立於主人之西俱南面主人以幣篚授使者使者受退
立於西階上東面執幣者又以授主人主人受以授使
副使副受之退立於使者之北俱東面主人還東階上
北面再拜送使者降自西階從者迓受幣篚使者當庭
實揖馬以出牽馬者從出使者出大門外之西東西立
從者迓受馬主人出門東西面再拜送使者退主人入
立於東階下西面僂者告於主人曰賓不顧矣主人反
於寢使者奉答表詣闕納吉使者之辭曰加諸卜筮占

曰日從制使某也入告主人之辭曰臣某之女若如人
龜筮云吉臣預在焉臣某謹奉典制其餘皆如納采納
徵其日使者至於主人之門外執事者入布幕於內門
之外玄纁束帛陳於幕上六馬陳於幕南北首西上執事
者奉穀珪以匱俟於幕東西面謁者引使者及主人立
於大門之內外賓者進受命出請事使者曰某奉制納
徵賓者入告主人曰奉制賜臣以重禮臣某祇奉典制
賓者出告入引主人出迎使者入執事者坐啓匱取珪

加於元纁牽馬者從入三分庭一在南北首西上執珪者在馬西俱北面其餘皆如納采冊后前一日守宮設使者次於后氏大門外之西尚舍設尚宮以下次於后氏閣外道西東向障以行帷其日臨軒命使如納采奉禮設使者位於大門外之西東向使副及內侍位於使者之南舉冊按及寶綬者在南差退持節者在使者之北少退俱東向設主人位於大門外之南北面使者以下及主人位於內門外亦如之設內謁者監位於內門

外主人之南西面司贊位於東階東南掌贊二人在南
差退俱西向又置一按於閣外使副乘輶持節備儀仗
鼓吹備而不作內僕進重翟以下於大門之外道西東
向以北為上諸衛令其屬布后儀仗使者出次就位主
人朝服立於東階下西面賓者受命出請事使者曰某
奉制授皇后備物典冊賓者入告主人出迎於大門外
北面再拜使者不答拜使者入門而左持節者前導持
按者次之主人入門而右至內門外位奉冊寶按者進

授使副冊寶內侍進使者前西面受冊寶東面授內謁者監持入立於閣外之西東面跪置於按尚宮以下入閣奉后首飾禕衣傳姆贊出尚宮引降立於庭中北面尚宮跪取冊尚服跪取寶綬立於后之右西向司言司寶各一人立於后左東向尚宮曰有制尚儀曰再拜皇后再拜宣冊尚儀曰再拜皇后又再拜尚宮授皇后以冊受以授司言尚服又授以寶綬受以授司寶皇后升坐內官以下俱降立於庭重行相向西上司贊曰再拜

掌贊承傳皆再拜諸應侍衛者各升立於侍位尚儀前
跪奏曰禮畢皇后降坐以入使者復命其遣使者奉迎
其日侍中版奏請中嚴皇帝服冕出升所御殿文武之
官五品已上立於東西朝堂奉迎前一日守宮設使者
次於大門之外道右設使副及內侍次於使者次西俱
南向尚舍設宮人次於閣外道西奉禮設使副持按執
鴈者持節者及奉禮贊者位如冊后又設內侍位於大
門外道左西面又設宮人以下位於堂前使副朝服乘

輶持節至大門外次宮人等各之次奉迎尚儀奏請皇后中嚴傳姆尊皇后尚宮前引出升堂皇后將出主婦出於房外之西南向文武奉迎者皆陪立於大門之外文官在東武官在西皆北上謂者引使者詣大門外立主人立於內門外堂前東階下西面賓者受命出請事使者曰某奉制以今吉辰率職奉迎賓者入告主人曰臣謹奉典制賓者出告入引主人出門南北面再拜謁者引入至內門外堂西階使者先升位於兩楹間南面

副在西持桉執鴈者在西南俱東面主人升東階詣使者前北面立使副授以制書曰有制主人再拜使者宣制主人降詣階間北面再拜稽首升進北面受制書主人再拜北面立使副授以鴈主人再拜進受仍北面立賓者引二人對舉答表桉進主人以表授使副再拜降自西階以出復門外位奉禮曰再拜贊者承傳使副俱再拜使者曰令月吉日臣某等承制率職奉迎內侍受以入傳於司言司言受以奏聞尚儀奏請皇后再拜主

人入升自東階進西面誠之曰戒之敬之夙夜無違命
主人退立於東階上西面母誠於西階上施衿結帨曰
勉之敬之夙夜無違命皇后升輿以降升重翟以几姆
加景內宮侍從及內侍導引應乘車從者如鹵簿皇后
車出大門外以次乘車馬引從同牢之日內侍之屬設
皇后大次於皇帝所御殿門外之東南向將夕尚寢設
皇帝御幄於室內之奧東向鋪地席重茵施屏障初昏
尚食設洗於東階東西當東雷南北以堂深后洗於東

房近北設饌於東房西墉下豆各二十四簠簋各二盤
各三俎三尊於室內北牖下玄酒在西又尊於房戶外
之東無玄酒坫在南加四爵合鬯器皆烏漆鬯以匏皇
后入大門鳴鐘鼓從永巷至大次前回車南向施步障
尚儀進當車前跪請降車皇后降入次尚宮引詣殿門
之外西向立尚儀跪奏外辦請降坐禮迎皇帝降坐尚
宮前引詣門內之西東面揖后以入尚食酌玄酒三注
於尊尚寢設席於室內之西東向皇帝導后升自西階

入室即席東向立皇后入立於尊西南面皇帝盥於西洗后盥於北洗饌入設醬於席前菹醢在其北俎三設於豆東豕俎特在北尚食設黍於醬東稷稻梁又在東設菹於醬南設后對醬於東當特俎菹在其南北上設黍於豕俎北其西稷稻梁設菹於醬北尚食啓會郤於簠簋之南對簠簋於北加匕箸尚寢設對席於饌東尚食跪奏饌具皇帝揖皇后升對席西面皆坐尚食跪取韭菹孺醢授皇帝取菹孺醢授皇后俱受祭於豆間尚

食又取黍實於左手遍取稷稻粱反於左手授皇帝又
取黍稷稻粱授皇后俱受祭於豆間又各取肺絕末授
帝后俱祭於豆間尚食各以肺加於俎司飾二人以巾
授皇帝及皇后俱洗手尚食各跪品嘗饌移黍置於席
上以次授肺脊帝后皆食三飯卒食尚食二人俱盥手
洗爵於房入室酌於尊以授帝后俱受祭尚食各以肝
從皆奠爵振祭躋之尚食皆受實於俎豆各取爵皆飯
尚儀受虛爵奠於坫再酳如初三酳用鬯如再酳尚食

俱降東階洗爵升酌於戶外進北面奠爵興再拜跪取
爵祭酒遂飲卒爵奠遂拜執爵興降奠於篚尚儀北面
跪奏稱禮畢興帝后俱興尚宮引皇帝入東房釋冕服
御常服尚宮引皇后入幄脫服尚宮引皇帝入尚食撤
饌設於東房如初皇后從者餕皇帝之饌皇帝侍者餕
皇后之饌皇太子納妃皇帝遣使者至於主人之家不
持節無制書其納采問名納吉納徵告期皆如后禮其
冊妃前一日主人設使者次大門之外道右南向又設

宮人次於使者西南俱東向障以行帷奉禮設使者位
於大門外之西副及內侍又於其南舉冊按及璽綬命
服者又南差退俱東向設主人位於門東北面又設位
於內門外如之設典內位於內門外主人之南西面宮
人位於門外使者之後重行東向以北為上障以行帷
設贊者二人位於東階東南西向典內預置一按於閣
外使副朝服乘輶持節鼓吹備而不作至妃氏大門外
次掌嚴奉褕翟衣及首飾內廄尉進厭翟於大門之外

道西東向以北為上諸衛帥其屬布儀仗使者出次持
節前導及宮人典內皆就位主人朝服出迎於大門之
外北面再拜使者入門而左持按從之主人入門而右
至內門外位奉冊寶按者進授使副冊寶內侍西面受
之東面授典內典內持入跪置於閣內之按奉衣服及
侍衛者從入皆立於典內之南俱東面傳姆贊妃出立
於庭中北面掌書跪取玉寶南向掌嚴奉首飾褕翟與
諸宮官侍衛者以次入司則前贊妃再拜北面授冊寶

於掌書南向授妃妃以授司閨司則又贊再拜乃請妃
升坐宮官以下皆降立於庭重行北面西上贊者曰再
拜皆再拜司則前啓禮畢妃降座入於室主人儕使者
如禮賓之儀臨軒醮戒前一日衛尉設次於東朝堂之
北西向又設宮官次於重明門外其日皇太子服袞冕
出升金輅至承天門降輅就次前一日有司設御座於
太極殿阼階上西向設羣官次於朝堂展縣陳車輅其
日尚舍設皇太子席位於戶牖間南向莞席藻席尚食

設酒尊於東序下又陳籩脯一豆醯一在尊西脯前三
刻設羣官版位於內奉禮設版位於外如朝禮侍中版
奏請中嚴前三刻諸侍衛之官侍中中書令以下俱詣
閣奉迎典儀帥贊者先入就位吏部兵部贊羣官出次
就門外位侍中版奏外辦皇帝服通天冠絳紗袍乘輿
出自西房即御座西向羣官入就位典儀曰再拜贊者
承傳在位者皆再拜皇太子入縣南典儀曰再拜贊者
承傳皇太子再拜詣階脫舄升席西南面立尚食酌酒

於序進詣皇太子西東面立皇太子再拜受爵尚食又
薦脯醢於席前皇太子升席坐左執爵右取脯擣於醢
祭於籩豆之間右祭酒興降席西南面坐啐酒奠爵興
再拜執爵興奉御受虛爵直長徹薦還於房皇太子進
當御坐前東面立皇帝命之曰往迎爾相承我宗事最
帥以敬皇太子曰臣謹奉制旨遂再拜降自西階納駕
出門典儀曰再拜贊者承傳在位者皆再拜以次出侍
中前跪奏禮畢皇帝入皇太子既受命執燭前馬鼓吹

至於妃氏大門外道西之次回輶南向左庶子跪奏降
輶之次主人設几筵妃服褕翟花釵立於東房主婦立
於房戶外之西南向主人公服出立於大門之內西向
在廟則祭服左庶子跪奏請就位皇太子立於門西東
面賓者受命出請事左庶子承傳跪奏皇太子曰以茲
初昏某奉制承命左庶子俛伏興傳於賓者入告主人
曰某謹敬具以湏賓者出傳於左庶子以奏賓者入引
主人迎於門外之東西面再拜皇太子答再拜主人揖

皇太子先入掌畜者以鴈授左庶子以授皇太子執鴈
入及內門主人讓曰請皇太子入皇太子曰某弗敢先
主人又固請皇太子文曰某固弗敢先主人揖皇太子
入門而左主人入門而右及內門主人揖入及內門當
曲揖當階揖皇太子皆報揖至於階主人曰請皇太子
升皇太子曰某敢辭主人固請皇太子文曰某敢固辭
主人終請皇太子文曰某終辭主人揖皇太子報揖主
人升立於阼階上西面皇太子升進當房戶前北面跪

奠鴈再拜降出主人不降送內廄尉進獻翟於內外傳
姆導妃司則前引出於母左師姆在右保姆在左父少
進西面戒之曰必有正焉若衣花命之曰戒之敬之夙
夜無違命母戒之西階上施衿結帨命之曰勉之敬之
夙夜無違命庶母及門內施鞶申之以父母之命命之
曰敬恭聽宗父母之言夙夜無愆視諸衿鞶妃既出內
門至輅後皇太子授綏姆辭不受曰未教不足與為禮
妃升輅乘以几姆加景皇太子馭輪三周馭者代之皇

太子出太門乘輶還宮妃次於後主人使其屬送妃以
族從同牢之日司閨設妃次於閭內道東南向設皇太
子御幄於內殿室內西廂東向設席重茵施屏障設同
牢之席於室內皇太子之席西廂東向妃席東廂西向
席間量容牢饌設洗於東階東南設妃洗於東房近北
饌於東房西墉下豆各二十簠簋各二鉶各三瓦登一
俎三尊在室內北墉下玄酒在西又設尊於房戶外之
東無玄酒篚在南實四爵合登皇太子車至左閣回輶

南向左庶子跪奏請降輶入俟於內殿門外之東西面
妃至左閣外回輶南向司則請妃降輶前後扇燭就次
立於內殿門西東面皇太子揖以入升自西階妃西向
執扇燭者陳於東西階內皇太子即席東向立妃從升
立司饌進詣階間跪奏具牢饌司則承令曰諾遂設饌
如皇后同牢之禮司饌跪奏饌具皇太子及妃俱坐司
饌跪取脯取韭菹皆擩於醢授皇太子又取授妃俱受
祭於籩豆之間司饌跪取黍實於左手遍取稷反於右

手授皇太子又授妃各受祭於菹醢之間司饌各立取肺皆絕末跪授皇太子及妃俱受又祭於菹醢之間司饌俱以肺加於俎掌嚴授皇太子妃巾帨手以柵扱上鉶遍擣之祭於上豆之間司饌品嘗妃饌移黍置於席上以次跪授肺脊皇太子及妃皆食以漬醬三飯卒食司饌北面請進酒司則承令曰諾司饌二人俱盥手洗爵於房入室酌於尊北面立皇太子及妃俱興再拜一人進授皇太子一人授妃皇太子及妃俱坐祭酒舉酒

司饌各以肝從司則進受虛爵奠於篚司饌又俱洗爵
酌酒再酳皇太子及妃俱受爵飲三酳用巵如再酳皇
太子及妃立於席後司則俱降東階洗爵升酌於戶外
北面俱奠爵興再拜皇太子及妃俱答拜司則坐取爵
祭酒遂飲啐爵奠遂拜執爵興降奠爵於篚司饌奏徹
饌司則前跪奏稱司則妾姓言請殿下入皇太子入於
東房釋冕服著袴褶司則啓入妃幃幄皇太子乃入室
媵餕皇太子之饌御餕妃之饌親王納妃其納采問名

納吉納徵請期使者公服乘犢車至於妃氏之家主人受於廟若寢其賓主相見賓贊出入升降與其禮賓者大抵皆如皇太子之使而無副其聘以玄纁束帛乘馬玉以璋冊命之日使者持節有副親迎王袞冕輶車至於妃氏之門外主人布席於室戶外之西西上右几又席於戶內南向設鮓醴於東房東北隅篚在尊南實殼一角柵一脯醢又在其南妃於房內即席南向立姆立於右主人立於戶外之東西面內贊者以解酌醴加柵覆

之面柄進筵前北面妃降席西南面再拜受觶內贊者薦脯醢妃升席跪左執觶右取脯擧於醢祭於籩豆之間遂以柵祭醴三始拔一祭又拔再祭興筵末跪啐醴建柵奠觶降筵西南面再拜就席立主人乃迎賓其餘皆如皇太子之迎初昏設洗於東階東南又設妃洗於東房近北饌於東房障以帷豆十六簠簋各二盞各二俎三羊豕腊羊豕節折尊坫於室內北墉下玄酒在西又設尊於房戶外之東無元酒坫在南實以四爵合巹

王至降車以俟妃至降車北面立王南面揖妃以入及
寢門又揖以入贊者酌玄酒三注於尊妃從者設席於
奧東向王導妃升自西階入於室即席東面立妃入立
於尊西南面王盥於南洗妃從者沃之妃盥於北洗王
從者沃之俱復位立贊者設饌入西面告饌具王揖妃
即對席西面皆坐其先祭而後飯乃酳祭至於燭入皆
如太子納妃之禮公主出降禮皆如王妃而納采問名
納吉納徵請期主人皆受於寢其賓之辭曰國恩貺室

於某公之子某公有先人之禮使某也請主人命賓曰
寡人有先皇之禮云其諸臣之子一品至於三品為一
等元纁東乘馬玉以璋四品至於五品為一等玄纁東
兩馬無璋六品至於九品為一等玄纁東儺皮二而無
馬儺皮二內攝之毛在
內左首立於幕南其餘納采問名納吉納徵請期
大抵皆如親王納妃其親迎之日大昕壻之父女之父
告於禰廟若寢將行布席於東序西向又席於戶牖之
間南向父公服坐於東序西向子服其上服一品袞冕

一品鷩冕三品毳冕四品絲冕五品玄冕六品爵弁庶人絳公服升自西階進立於席西南向贊者酌酒進北面以授予子再拜受爵贊者薦脯醢於席前子升席跪左執爵右取脯擣於醢祭於籩豆之間右祭酒執爵興降席西南面跪卒爵再拜執爵興贊者受虛爵還尊所子進立於父席前東面父命之曰往迎爾相承我宗事勗率以敬先妣之嗣若則有常庶子但云往迎爾相勗率以敬子再拜曰不敢忘命又再拜降出乃迎初昏設洗陳饌皆如親

王牲用少牢及腊三俎二籩二簠其豆數一品十六二
品十四三品十二婿及婦共牢婦之簠簋及豆登之數
各視其夫尊於室中北墉下設尊於房戶外之東加幕
勺無玄酒夫婦酌於內尊四爵兩巵凡六夫婦各三爵
主人乘革輶至於婦氏大門外女準其夫服花釵翟衣
入於房以解酌醴如王妃主人迎賓以入遂同牢皆如
親王納妃之禮質明布舅席於東序西向布姑席於房
戶外之西南向舅姑即席婦執筭棗栗入升自西階東

面再拜進跪奠於舅席前舅撫之婦退復位又再拜降
自西階受筭假修升進北面再拜進跪奠於姑席前姑
舉之婦退復位又再拜婦席於姑西少北南向側尊旛
醴於房內東壁下籩豆一實以脯醢在尊北設洗於東
房近北婦立於席西南面內贊者盥手洗觶酌醴加柵
面柄北面立於婦前婦進東面拜受復位內贊者西階
上北面拜送乃薦脯醢婦升席坐左執觶右取脯擗於
醢祭於籩豆之間以柵祭醢三始极一祭又极再祭加

柂於解面葉興降席西東面坐啐醴建柂興拜內贊者
答拜婦進升席跪奠解於豆東取脯降自西階以出授
氏從入於寢門外盥饋舅姑入於室婦盥饋布席於室
之與舅姑共席坐俱東面南上贊者設尊於室內北墉
下饌於房內西墉下如同牢牲體皆節折石載之於舅
俎左載之於姑俎婦入升自西階入房以醬進其他饌
從者設之皆加匕箸俎入設於豆東贊者各授箸舅姑
各以篚菹擣於醬祭於籩豆之間又祭飯訖乃食三飯

卒食婦入於房盥手洗爵入室酌酒酳舅進奠爵舅席
前少東西面再拜舅取爵祭酒飲之婦受爵出戶入房
奠於右盥手洗爵酌酒酳姑設婦席於室內北墉下尊
東面婦徹饌設於席前如初西上婦進西面再拜退升
席南向坐將餕舅命易醬內贊者易之婦及餕姑饌婦
祭內贊者助之既祭乃食三飯卒食內贊者洗爵酌酒
酳婦降席西面再拜受爵升席坐祭酒飲執爵興降席
東南面立內贊者受爵奠於坫婦進西面再拜受爵升

席坐祭酒飲訖執爵興降席東南面立內贊者受奠於
篚婦進西面再拜舅姑先降自西階婦降自阼階凡庶
子婦舅不降而婦降自西階以出

唐書卷十八

唐書卷十八考證

禮樂志八登各二〇通典作各一

卷十八 考證

唐書卷十八 考證